

## MISHTA-MITSHISHU

Etuat Rich

— Nipuumun, iteu nenua utishkuema ne napeu. Mishta-mitshishu ka-tshinatikunana, nitishinen. Nutim ka-nanatuaneua ushkashia, nitishinuau, iteu.

— Tanite ma ek<sup>u</sup> tshe itin ? Kanapua tshe kushtak<sup>u</sup> natautakui, itiku nenua utishkuema.

Ek<sup>u</sup> eshpish taht anite, tshek uet matueshinniti anite utshipishkuamit auennua, nanamaiminua uitshuau. Ekue shatshuapit. Auennua nenua, Mishta-mitshishua, mishta-mishishtinua ! Ekue unuishtuat tanite tshi puateu.

— Nussim, itiku, tshitshue nitshitimatshishin. Nutim ninanatuanen ninataun. Ma nussim tshipa tshi ueueshtan, tshipa tshi tshinikatain ?

— Eshe, iteu.

Ek<sup>u</sup> tshanikataumat ushkashinua (apu tshi pitukaiat tanite mishta-mishishtinua).

— Aka nimushum, iteu, kutshipanita.

Uiepimitamuat atikuiana (pashunua nenua atikuiana) ekue sheshaupanniti.

— Eukuan nimushum, iteu, tshipa ishinakushin. Eukuan tshipa ishinakushinua etenitaman, nimushum.

— Eshe, itiku. Nussim, tshe tshishikatan, nika nataun.

Ekuana tshatshipanniti umushuma. Uet petunaniti upinua, nishuaush itashinua.

— Minuat nussim, itiku, eshk<sup>u</sup> apu tipipanit.

Minuat tshatshipanniti, eukuannu nishtunnu petunenua. Nanikutunnu ashu patetat tatunenua anite napate utitshinit.

— Ekuana ma nussim, itiku. Muk<sup>u</sup> nussim, tshitshue tshukum, ne tshukum, innua mueu. Tshe eka nita tashkamishkuin nussim tepishkati shakaikan.

— Eshe, iteu.

— Tshessinat tshika utshipitik<sup>u</sup> tshukum, itiku, tashkamishkuini tepishkati. Tepishkaniti netaut tshukum.

— Eshe, iteu.

Eshpish ma anite eitaht, ek<sup>u</sup> tshatshipitshiht utishkuema, nete ma ua uitshiht.

— Ekute tshe manukashuin ek<sup>u</sup>, iteu nenua utishkuema. Nika nataun, nika papamuten.

— Eshe, itiku.

Katshi tshituteniti, ekue tshitutet kie uin. Tshitshitapeu nenu utapan. Ek<sup>u</sup> apu minuatak anite tshipa uitshu ne ishkuue. Ekue matashkut kutakanu shakaikannu. Teshkamishkupitshit niate. Nete ma akamit, ekute uatshit ne ishkuue. Ek<sup>u</sup> ne mishta-tipishkuteu tanite ne napeu, tanite ekute anite tshe uitshiniti utishkuema. At niatak anite tshe uitshiniti — ka itat nenua utishkuema — apu taniti nana. Memititat, ekue tshitshipitshinikueni ekue tashkamishkupitshinikueni nete shakaikannu, mishikamanu nenu. Eukuannu tshessit ka itikut umushuma. Ek<sup>u</sup> uaushit pushtinaua, uiutikashu, tsheminat nemenu etutet. Ek<sup>u</sup> nete apitu ushteshish nenu shakaikannu, ekute mashten tsheminat umishtikuma. Ek<sup>u</sup> itenimeu : « Ekuana ek<sup>u</sup> nimishtikum mashten » kie kau apu tshi tshiuuet, kutaka tshetshi natat pushtinaua, tanite pitshanu anite uetutet.

« Ek<sup>u</sup> inishat nika tashkamishkun », itenitam<sup>u</sup>. Tshissu nene ka itikut umushuma. Miam tshi nakateu nenua upushtinama mashten ek<sup>u</sup> eiatshikat nasht, mishtakashti-tipishkanu, ekue natikut Mishta-mitshishua. Ekute anite shash ua nipaikut.

— Eka pitama nipaii, iteu, nika mashkutshin.

Ekue patshitinikut kau.

— Tshishuni anite, iteu.

Ekue nikupiuetshinikut nenua ushitinua (tanite mishta-upiuaunua nenua ushitinua), nete atamit etanikut. Eshpish ma pimunikut anite, uapatam<sup>u</sup> nenua ishkujea e takuanniti anite. Ek<sup>u</sup> nekamut : « Mishta-mitshishu nupaunik<sup>u</sup> », iteu.

— Ne an, itakanu, ka umushumit Mishta-mitshishua.

— Mishta-mitshishua ka umushumikue, iteuat.

— Ek<sup>u</sup> tapue eukuanitshe kanapua, itakanu.

Niate eka ka petakushit ishpimit, etunikut niate. Tshek anite uapatam<sup>u</sup> etunikut ek<sup>u</sup> nenipepatikut, ua utamishetshishimikut anite nenu tshissekanu, anite nenua tshekat, ekute anite ua utamishimikut mani. Eukuannu utshineshkan etashkunamuat anite ushukunnit. Niataiki mani tshissekanu, eukuannu tshineshkanu tiaatakushinit mani ne Mishta-mitshishu, kau ekue upipaniut mani ekue tueunat nete. Nete mitshishissa etaniti ekute etunikut. Mitshishissa nenua ui tshatshakataukushu, ek<sup>u</sup> uetutamikatsheuat utshineshkan. Ekue eka nutshikut uetutamikatsheuat nenua, ek<sup>u</sup> petshitinikut. Uiapamat umushuma epiniti, ekue natat nenua :

— Nussim, itiku, mate ka ititan.

— Eshe, iteu, apu ishpanian, ninutepan pushtinauat. Ek<sup>u</sup> inishat ua tashkamishkuian, ekute anite kiatshtinit.

— Eshe, itiku.

Tshishipuietshiniku nenua umikunnua ekute anite etanikut atamit.  
 Niakatuenimikut ek<sup>u</sup>, apu tshi nakataukut nenua umushuma, nakatuenimiku nenua  
 tanite tshipa nipaiku nenua ukuma at eka nakatuenimikut.

« Tepishkaniti ek<sup>u</sup> tshatshipanit », iteu itakanu nenua ukuma, « uet  
 petunat mani innua ek<sup>u</sup> emuat pietunati. Tshisht anitshenat mitshishissat, muk<sup>u</sup>  
 eukuan etiht », iteu itakanu. « Atut pishk<sup>u</sup> ma nitshi nipaiauat », itenimeu (mishta-  
 ishpanau ne uapitsheushkamik<sup>u</sup>, mishta-nushkau). « Atut pishk<sup>u</sup> ma nitshi  
 pikutan tshetshi nipaikau », iteu.

— Nimushum, iteu, ma tapuetam<sup>u</sup> nukum tshetshi utshishtunikatikut ?  
 Nipa mishitan kie nipa ishpanitan tshetshi nushkat.

Ekue uitamuat ne utishkuema, nateu anite epiniti.

— « Eshe », tshitik<sup>u</sup>, iteu, « eshe », tshitik<sup>u</sup> tshukum.

Ek<sup>u</sup> etutak utshishtunnu, mishta-mishitau. Piashteniti nenua minapakuna  
 mak nenu uapitsheushkamikunu eukuannu iapashtat. Nasht nushkanu anite.

— Nimushum, shash nitshishtan, iteu. Tshika natam<sup>u</sup> nukum.

Niatak tapue ne mitshishu. Mishta-minuatam<sup>u</sup> nenu eshpikueshimut kie  
 anitshenat mitshishissat ekute anite etutaiakaniht kie ne tshishennu.

— Nika ituten kie nin, iu.

Ekue itutet tapue, minuanu tapue.

« Ek<sup>u</sup> nenu nepataui », iteu itakanu, « mishta-nipauat. Tshashikaniti ek<sup>u</sup>  
 nepaht mishta-minekash, ishkanitshishikua nipauat nenu nepataui ». Ek<sup>u</sup>  
 sheshkauat uashka, nanatuapatam<sup>u</sup> nete tshe kashushtuat. Ek<sup>u</sup> sheshkauat  
 uashka ekue tshitishimat, nete kashushtueu. « Eukuannu ma nenu piekukashuht  
 », iteu itakanu, « nenua umushuma kie nenua ukuma piekukashuht ek<sup>u</sup> at ua

upauht ekue meshtikashuniti nenua utakanuaua. Ek<sup>u</sup> nepaikashukau », ekue itat itakanu. « Nenua ma Mishta-mitshishua, nenua ishkueua eukuan an meshkuaniti ushkana, ek<sup>u</sup> nenua umushuma pitshishkashinua », iteu itakanu.

Eukuannu nenu pepitatshet nenu uapitsheushkamikunu nenua ukuma, ek<sup>u</sup> nenua utapia eukuannu uet tshipuapitat. Ek<sup>u</sup> nete eshkuamishekanit ekute etutatat, aiatashkuaim<sup>u</sup> nenu, apu nenu tshi upinak nasht, ititashkuaim<sup>u</sup> nete. Ek<sup>u</sup> katshi pitutshet anite, tshepuashpitaushut ek<sup>u</sup> iaiatshipaniut ekue patshishinit anite. « Nishuau nipatshishin », iu itakanu, « ek<sup>u</sup> uetishapataman patush assi. » Minuat nenu piatshishinit, eukuannu assit piatshishinit. Ekue unuit. Tshekuannu, assit patshishinu ! « Eshk<sup>u</sup> anite pipun », iu itakanu, « anite assit. » Ek<sup>u</sup> uetashamikashut tshishtapakuna, tshishtapakuna uetashamitutuat.

Tshek ekue mitimet innua nenu umeshkanaminu pemipitshinikueni. Ek<sup>u</sup> metimet nenu. Ekute anite miam itakanu utishkuema etaniti nenua uiapamat innua. « Nete nupaunik<sup>u</sup> Mishta-mitshishu », eukuannu nenu tepatshimut itakanu nene eitutuat nenua ukuma kie nenua umushuma.

Ekuan.